

Tramonde tarandine

L'ha mann't Administrator

martedì 14 marzo 2006

Ultimo aggiornamento mercoledì 15 marzo 2006

Ancora una volta, sul Purtuso, Alice ci ha offerto l'opportunità di apprezzare l'aulica prosa di Aleng Along. E' un canto di sirena per i tarantini lontani…TN il vento che ne rimanda l'eco…

Cume glòbbe 'nfucáte
jè 'u sole ca stè' scènne
e se stè' 'ccòcchi'e vváse a 'u Mare Grànnne;
cu' le ràggie 'nduráte
ch'attùrne vè' spannènne,

pare ca Tàrde tott'a vè' pettànne.
E Jèdde, cundignóse,
se culle suse a ll'ònne a cume 'na vezzose
e ppo' s'assònne.

Véde le pescatùre,
cu' ll'uècchie scarazzáte,
ca 'mbrà ttànda culùre,
stànche e fadiate
hònne turnate.

Mére l'isele ardite,
a SSànde dedecate,
'na véla viànghe se vè' avvicienànnne;
da réte a SSànde Vite
'na Nave ha returnate

da 'na longa cruciére, a CChidde Vànne.
E Tàrende, ch'aspètte
a Chidde Marenáre
mettènnese 'u russètte
pe' le 'ngandáre,

páre ca se stè' bbràzze
cu' 'u Mare prufumáte
piccè da chidde vràzze
jè circundáte
da ogne llate.

Jè ssére e ggià stè' ccale
'nu vindezzule dóce
ca t'accarezze e a tutte vè' pertànnne,
partènnne da' u Canále,
quidde « Salùte a' vóce »

ca le do' Marenare stònnne a ffànnne,
fa ca mo' vo' ccu ddìce
a tutte:—Vu' penzáte
a rumanére amice,

no' v'arrajáte.
je ttànda corte 'a vîte;
'u sole ha da turnáre
ma vûje 'u stè' ssapíte
ca de cambáre
s'ha ddà spicciáre!—

Aleng Along